

scriptoribus rerum Polonicarum *Iudicium Teutonicorum* mentio iniiciatur, scilicet qui causas litigantium secundum iura Teutonum diiudicauerunt. Sub *iure Teutonico*, quoties haec vox apud scriptores in hac dissertatione allegatos occurrit, non aliud nisi *ius Saxonicum* seu Magdeburgicum intelligi, ex promiscua harum vocum adhibitione probari potest. Vetus iuris Saxonici tum temporis in Germania adeo communis fuit, ut DATT *de pace imp. publ. L. 4. c. 1. n. 7.* non immerito asserat, a seculo XIII. ad XV. omnem Germaniam iure Saxonico et Sueuico administratam fuisse. Confer. HARTKNOCH *de republ. Polon. L. 2. c. 2. §. 5.* Itaque aduentantes Germanorum coloniae non alia nisi iura Saxonica secum in Poloniam adducere potuerunt.

§. 13.

Iura Saxonica quemadmodum in Germaniae prouinciis iam dudum inualuere, anteaquam compilationes speculi Saxonici et iuris Weichbildici Magdeburgensis in publicum prodirent, ita etiam Polonis ea iam pridem antea innotuisse credo. Eo tempore autem, quo frequentes Germanorum coloniae, ut supra dictum est, in Poloniam transmigrabant, speculum Saxonicum ab Epkone Repkio, ut leges et consuetudines Saxonum antiquas ab interitu vindicaret, circa annum 1230. priuato studio collectum, iam iam prodierat; cui demum circa initium seculi XIV. ius Weichbildicum Magdeburgense accessit, quod COLERVS in *Orat. de iur. Saxon. orig. et progr.* haud absque ratione speculi Saxonici epitomen vocat. Etenim ipse *Glossator ad Art. 1. iur. Weichb.* fatetur: ea, quae in speculo Saxonico nimis prolixè dicta fuerint, ibi saltem breuius, et quae in illo nimis concise, hic plenius paululum exposita esse. Posteaquam iura Saxonica in foris Poloniae introducta ibique recepta, et in decidendis causis adhibita sunt, inualuere etiam prouocationes seu appellatio-